



# partii naleraq

4.maj 2016

UPA2016/122

**Matumuuna Inatsisartut aalajangiiffigisassaannik siunnersuuteqarpunga, Naalakkersuisut peqquneqassasut kingusinnerpaamik juni 2016-p ingerlanerani Inatsisartuni partiit isumaqatigiinniareerlugit saqqummiutissagaat, innuttaasut inuunermut ulorianaateqarsinnaasunik nappaateqartunut ilaquataasut 2017-miit danmarkimi napparsimasut angerlarsimaffianni akeqanngitsumik najugaqarsinnaanissaannut aqqutissiuussissallutik.**

(Inatsisartunut ilaasortaq Mimi Karlsen, Inuit Ataqtigigit)

Inatsisartunut ilaasortaq Mimi Karlsen Inuit ataqtigigit aalajangiiffigisassamik siunnersuuteqarpoq tassalu innuttaasut inuunermut ulorianaateqarsinnaasumik nappaatillit eqqarsaatigalugit Danmarkimi katsorsarneqartut ilaqutaminnik ingiaqateqarsinnaanerit pillugu tamannalu sinnersuut oqaaseqarfigissavarput.

Innuttaasut nunatsinni ilaatigut perulunnartumik nappaatillit eqqarsaatigalugit ilaqutaminnik ingiaqateqarsinnaanerannik periarfissat ukiorpaalunngortuni maani eqqartorpagut, nalunngilarpullu tamanna pisariaqartinneqartuortoq, taamaattumik oqaluuserineqartup matuma maannakkut aalajangersaaffigalugu inaarneqarnissaa kissaatiginarsilluinnarpoq.

Uani siunnersuummi Naalakkersuisut peqataarusussuseqarlutik saqqummiussaqaarnerat assut nuannaarutigalugu qujassutigaarput, tassami ilisimavarput inunnguit nappaammik eqqorneqarsimasut assut ilaqutaminnik ingiaqateqarnissartik pisariaqartittaraat, taamaattumik naalakkersuisut aqqinnissamik siunniussaqaarnerat nuannaarutigalugu taperserparput.

Aammalu iluarisimaarparput napparsimasut tamarmik kalaallit peqqissartut angerlarsimaffianiittartut assigiimmik pineqarlutik periarfissaqarsinnaanerit naalakkersuisunit eqqarsaatigineqartoq taperserusunnarluinnarmat. Inuit assigiinngilagut, aammalu tarnikkut timikkullu nukittussuserput assigiinngilaq, taamaattumik ataatsimoortumik isiginnilluni napparsimasunut aqqissuussiniarneq iluarisimaarlugu oqaatigissavarput.

Naalakkersuisut allanngutissaatut siunnersutaat tassalu 1.januar 2017 aallarnerfigalugu allnagortinneqarnissaanik siunnersuut, aammalu piviusunngortinneqarnissaa aningaasanut inatsimmut 2.mio.kruuninik siunertalimmut immikkoortitsisoqarnissaanik anguniagartoq taperserparput.

Taamatut oqaaseqarluta Mimi Karlsen Inuit ataqtigigit siunnersuutaa Partii Naleqqamiit taperserparput, peqqinnissamat isumaginninnermilu ataatsimiititaliami suliarilluarneqarnissaa innersuussutigalugu.

Hans Enoksen